

TIBÍAMAN LIGÁRADAN PÁBLO JOUN TESALÓNICANA

Labúrüjan Páblo jáma líbirigu joun tílana ligílisi to Tesalónicaboun

1 ¹Áu Páblo lúma Silváno láu Timotéo, wabúrüjañoun gárada to jun, jugúya tílana ligílisi to ubúruguboun Tesalónica ja lánigubaña Wáguchi Búngiu lúma Wabúreme Jesucrístu. ²Resíbi jumeí abíniruni lúma darángilaü jámagiñe.

Lagúseragüdübaña Búngiu gafígountiña dánme liábin Crístu

³Nidújeñu, teínqui wamúti Búngiu súnwandan juágu, queísi lúnti lan wadúgüni, lugúndun laweíriduña jafñen sarágu, áni ínsiñeni le jídaanbei jubáruagua aweírideinatima líña súnwandan. ⁴Adímurejatiwa buíti juágu títan buri lílígílisin Búngiu, luágu gurásu lúma afñeni le jarúfudubei lídan sun eíbaajoüni lúma idíjeri buri le jasúfurirubei lueígiñe Crístu. ⁵Arúfuda lumúti lubuídun jawándun luágu úragua lan Búngiu lídan ligáburi lagúseragüdÜn, láu lanúgünün quei garíchatíña lun jebélurun lídoun larúejan, le uágubei jasúfurira.

⁶Ladúga gíñe úragua lan Búngiu, lachúlürüba wéyu lun lasúfuriragüdüniña ja asúfuriragüdübalün, ⁷lúma gíñe lun líchugun eméraaguni jun, jugúya le asúfurirubei ítara quei wagía, lídaanme wéyu le lúnbei lachúlaagun Wabúreme Jesúsu siélugiñe lídan wátu geméti jáu lání ánjeligu ja gabáfubaña. ⁸Liábinba lun labeíchuniña ja masúbudirunbalin Búngiu, madúgün jagía gásu láu ugánu luáguti asálbaruni le wabíjibeí lídaangiñe Wabúreme Jesúsu. ⁹Agúnrinchawagúni le magúmuchaditi, ligíaba jabeichúagüle, jabugúba díse lueí laríjin Búngiu lúma luweírigun lúma lubáfu. ¹⁰Dánme le liábin Crístu, laríjüba luweírigun jádan lánigu, ábame laweíridun janígi sun ja afñeñabaña luágu, áni jugúya, jádaanbadün gürígia jagía queísi afñeedün lan luágu le waríñagubei jun luágu.

¹¹Ligía lébubei súnwandan lan wayúmuragun juágu, amúriaja wagía lúma Wabúngiute lun jarúfuduni luágu garícha jumá lun jádaanbadün lan

ja únbaña lagúara. Ayúmuraguatiwa gíñe lun Búngiu lun lagúnfulirun sun jayúmajan lun buídu lan jigáburi, láu lubáfu, lúma buri sun wadágimanu le jadúgübei ladúga jafíñen. ¹²Láu igáburi le, líchugúba uweírighuni lun líri Wabúreme Jesúsu lídan jibágari, ábame líchugún uweírighuni jun luágu lareídun Wabúngiute lúma Wabúreme Jesucrístu.

Le lúnbei lasúseredun lubáragiñe lagíribudun Jesucrístu ubouágun

2 ¹Guetóti, nidújeñu, libúgürü liábin Wabúreme Jesucrístu, dánme liábin oúndaraguawa lúma, ²amúriajatiwa júma lun masáansirun jumáni ligáburi jarítangun ítara uménrengun, masústangun jugúyame luágu ni ában ugánu, o dimúrei buri le uáguti laríñawagua luágu lúmagiñeti lan Búngiu, ni tuágu gárada to uáguboun jaríñaga luágu wámagiñetu lan, to aríñaguboun luágu chúlújali lan luwéyuri Wabúreme lun lagíribudun ubouágun. ³Mígiraguagüda jumá júngua lun jeyeedúniwa ítara. Lugúndun lubáragiñeme lachúlürün wéyu ligía, njeinbei awúribujani lúma Búngiu, lachúlaaguba gíñe lágani Crístu, le lunbei lagúnrinchawagún. ⁴Ligía láganibei Búngiu, liñúraguba lúngua luágu sun cátei le luáguti Búngiu, lachúlürüba gíñe añúura tídan lilígilisin Búngiu, camá jamuga Búngiu ligía, ligía guánarügü aríñagati luágu Búngiu lan.

⁵¿Marítangun jumútisan luágu aríñagañaja náni meja buri cátei le jun dán meja le anájeingua lan júma? ⁶Subúdi jumúti gíñe ída líña lán meja nadímurejan luágu ában ubáfu le lúnbei leréderuni liábin lágani Crístu lubáragiñe lidáni. ⁷Luwádigimariña wuríbani guetó, arámudagu, áni lúnti lagídarúniwa le eréderubalin lágani Crístu ligía lubáragiñe gayára lan láfuridun lidoun larúgounga. ⁸Ligíaba larijóuniwa, áni lagúnrinchagubei Wabúreme Jesúsu ágani ligía láu ában dimúrei, lúma láu luweírighun le áubei liábin. ⁹Ladúgaba Máfia liábin lágani Crístu ligía, lachúlürüba láu sarágu ubáfu, ladúgüba buri miláguru yéeti lun layéedaguniña giirígia. ¹⁰Layúsuruba sun luwúyeri wuríbani lun layéejaniña ja lídaanbaña úma lun güringuaü, quei mája jabeí lun jerésibiruni ináriini luáguti Crístu lun jasálbarun. ¹¹Ligía líchugunbáliña Búngiu lidoun buléiguauí lun jeyeedúniwa lúma lun jafíñerun luágu iyéeni, ¹²lun jasíadirúniwa lun máfiougati sun ja májabaña jafíñerun luágu Crístu, jínsiñerügü ligía wuríbani joun.

Anúadajouítiña lun jasálbarun

¹³Ánjein jugúya, wadújeñu jínsiñetiña lun Crístu, súnwandan teínqui wamúti Búngiu juágu lugúndun anúadaja lumútün lúmagiñe lagúmeserun dan lun jasálbaruba lan láu Sífiri Sándu le arúmadagüdúbarun janígi, lúma ináriini luágu wasálbarun lídaangiñe Jesucrístu, le uágubei jafíñera. ¹⁴Ligía lagúarunbei Búngiu jun, lun jasálbarun láu ugánu le wapúrichijabei, lun gafánraanbadün lan lídan luweírighun Wabúreme Jesucrístu.

¹⁵Ítara líña lubefti nidújeñu, derégüdagu meme jumá, mabúlieidagun jugúyame lueí buri arúfudajani le rúwamaalíbei jun láu dimúrei lúma

táu gárada. ¹⁶Wabúreme guánarügü Jesucrístu lúma Wáguchi Búngiu, le arúfuda láalibei línsiñejabu woun láu lareídun, ¹⁷ru ligía ámalijouni le magúmuhaditi woun lúma ában eménigini buíti, rúla dúgüdaguai tun janígi, derégüdaguagüda laúnme lun jaríñaguni lúma lun jadúgüni sun le buídubei.

Amúriajati Páblo jáma lun jayúmuragun lun Búngiu luágu

3 ¹Lagúmujoún cátei, nidújeñu, ayúmuragua jumá wawágu, burúgua lámuga ugánu luáguti Wasálbaragüle furése lídan sun fulásu, resbíwa ligíame láu ugúndani queísi lasúseredun jagánagua. ²Ayúmuragua jumá gñe lun gayára lan weséfurun jawei wügúriña wuríbatíña, lugúndun máma sun gürígia ubouágu affñetiña luágu Crístu. ³Ánjeinti Búngiu, gayáraati waffñerun luágu, luágu lagúnfuliruba lan láu lerérun, lárügüdubadün derégüdagu, goúnigilaúnme tueí lisádarán Máfia. ⁴Jeménigitiwa luágu Wabúreme Búngiu luágu adúga jumáni le waríñagubei jun áni luágu jadúga mémebei lan. ⁵Ideragualaún Búngiu lun jasándiruni lísiñejabu jun, lúma lun gagúraasun jumá quei Crístu luágu jasúfurirun.

Lúnti wawádigimaridun

⁶Nidújeñu, aríñagatina jun lídan líri Wabúreme Jesucrístu lun jadísedun lueí furúmieguarügü jídaangiñe le májati luwádigimaridun, le mabágaridunti úaragua lúma arúfudajani le jibíjubei wámagiñe. ⁷Subúdi jumúti ída lúba lan luwúyeri wabágaridun jagánagua lun jafálaruni wáni jémpulu, merédetiwa mawádigimariga jagánagua. ⁸Meígin wamúti jeígin, mafáyeirunga wameí. Lubáragiñe líra, ñadágimeintiwa, áfaagua wagía wéyuagu áriebru, lun māmabadiwa lan ában ijúrügu lun ni ában jídaangiñe. ⁹Láu sun garícha wamá yebe lun wamúriajan júma lun jíderaguniwa, ñadágimeinrügütiwa lun wíchugun ában jémpulu jun lun jafálaruni. ¹⁰Dán meja le júma wamá, rúwamuti meja gumádi le jun. “Le májabei luwádigimaridun, meígalá.” ¹¹Agáambatiwa luágu añájein lan jídaangiñe májatiña jawádigimaridun, jerédera madúgünga ni cáta, eténira lun le moún lubei jeténirun lun. ¹²Waríñaguña joún buri gürígia jagía láu lugúmadin Wabúreme Jesucrístu lun jawádigimaridun darángilañu lun jagáñeirunun jeígan fein. ¹³Nidújeñu, mabúchadalá juágu adúga buíti. ¹⁴Ánjein ñi ában le madúgünti gásu láu le waríñagubei tídan gárada to, aríja jumeí cátei lan, memétera jumá lúmoun, barú lámuga busíganu. ¹⁵Manúga jumeí quei ágani, erérarügü jumá lun queísi idújei.

Lagúmujoún abíniruni

¹⁶Wabúreme Jesucrístu méme le lánina darángilaü, rúla darángilaü jun lídan sun luwúyeri, súnwandan. Júmalá sun jugúya Wabúreme, súnwandan.

¹⁷Áu Páblo, nabúrüjañein mábugaü le jun láu guánarü nújabu lúma nilétüran. Ítara lúba jasúbudiruni luágu áu lan óunajabarun gárada to.
¹⁸Binílaün Wabúreme Jesucrístu sun jugúya. Ítaralá.